

a b è bò kalo o kalo  
malikibarudiso fè-a kuntigi:  
amadu ganyi kanté

bp 24  
**bamakò - mali**  
telefòn : 221.04

dòròmè 4 — ccp : 0155

# kibaru

a b è bò kalo o kalo, faso ka kibarudiso ka yamaruya kònò  
san 6nan - nimòrò 64 zuwen kalo San 1971

## balikukalan bè sen kan

kalo saba o kalo saba, balikukalansoba bè gafe dò bò, min bè kunnafoni di balikukalan kan, mali fan tan ni naani kònò. gafe in bè sèbèn nasarakan na, balikukalansoba bolofara fè, min nyèsinnen bè kiimèli kè cogoyaw ma.

an bêna kuma balikukalan lahalayaw kan, ka a ta zanwuye kalo tile fòlò, fo marisi kalo tile 31. gafe in b'a jira ko, n'i ye mali kònò balikukalansow tila tila, k'u kè kêmè kêmè kuluw ye, kêmè kulu o kêmè kulu la,  
- balikukalanso 77 bè san fòlò kalan na,  
- balikukalanso 20 bè san filanan kalan na,  
- balikukalanso 3 sera yèrèkalan ma.

yèrèkalan balikukalansow bée bè tiga ni suman sènè sèriwusi ka baara yòròw la.

an b è bi min na, balikukalan timèlen bè nin yòrò ninw na :

- fòlò : tiga ni suman sènè sèriwusida ka maraw kònò.
- filanan : koori ni da sènè sèriwusida ka maraw kònò.
- sabanan : segu malosènè sèriwusida ka maraw kònò.
- naaninan : ofisi malosènè yòròw la.
- duurunan : sirasènè sèriwusida ka maraw kònò.
- wòorònan : moti malosènè sèriwusida ka maraw kònò.

kiimèli b è kè nyinan balikukalanso caman kònò. ni o kiimèli banna, an na se ka kunnafoni jònjòn wèrèw di.

mamadu yusufu sise

cikè baarada tògò	zafu hakè	balikukalan kònò, olu hakè	kalandenw hakè
tiga ni suman sènè baarada	27	593	12452
koori ni da sènè baarada	37	471	8691
segu malosènè baarada	11	131	3662
ofisi malosènè yòròw	6	60	1911
sirasènè baarada	3	17	474
moti malosènè baarada	3	15	56

tabulo filè ninye, min bè kuma ninw sèmèntiya. nka, kunnafoni dòw b'a jè, ka bò kucala, mafunè, sikaso, bafulabè, ani moti.

## baarakalan dò kèra suransantumuntò

suransantumuntò ye kita da fè dugu dò ye, dugu min ye balikukalan sèbèkòrò minè, kabini a daminè tuma, fo ka n'a bila bi la. an b è bi bi min na, mògò kalannen ka ca yen. o mògòw dun sago tè, ka dan kalanjè ni jate dama kalan de ma. u b'a fè, dò ka fara u ka dònniya kan hali bi.

nin hakili nyuman min bòra suransantumuntò, o y'a to, baarakalan dò sera ka kè yen, k'a ta awirili kalo tèmènnen tile 14 la, ka n'a bila a tile 20 la. kalan kèra dugukolo ni sènè cogow de kan.

sani kalan in ka daminè, nyògonye dò kèra suransantumuntò dugu kònò. o nyògonye sen fè, suransantumuntò mògòkòròbaw ye u hamina kow fò,

dugukolo ni sènèkè cogò lahalaya la.

u y'a jira k'a fò ko yèlèma caman donna sènèkè cogow la, minw b'a

to, sènè b è yiriwa. nka, u yèrè y'a kòlòsi ko ko dò b'a la, min bè u kònònafili kosèbè : o ye u ka dugukolo fanga dògòya ko ye.

(a kunnafoni bè nyè 2 ni nyè 3 la)

# baarakalan dò kè

## mògòkòròbaw hamina kow

fòlò fòlò, ni dugukolo fanga tun bë nyini ka dògoya, foro tun bë bila, ka kè manyan ye. o kòrò ye ko dugukolo bë i sègèn labò, ka fanga sòrò tugun, nka sisán, mógo cayara, fo o mógo bëe balo tè sòrò ni foro sènènen ma caya. sènèkè-minèn minw bòra kosa in na, i n'a fò, sari ni dabanya, olu fana b'a to, forow bë bonya ka tèmèn fòlò taw kan. o bée lajèlen b'a to, manyan ko bë dògoya ka ta a fè, fo waati dò bë na, manyan si tèna sòrò suransantumuntò dugukolo kan tungun.

o la, dòw kònòna fililen don, k'a fò ko n'u tora o cogo la, dugukolo fanga bëna ban pewu. o dun mana kè don min, fo suransantumuntòkaw ka bò u fa dugukolo kan, ka taa sigi yòrò wèrè.

dòw y'a jira fana ko tigasènè yi-riwara u ka dugu kònò, fo ka su-mansènè dògoya. ni sanji nana san min, nyò bë sòrò ka dugu kònò mógo labò, nka fèn tè se ka mara ka san wèrè nyèsigi. ni sanji dùn ma na a na cogo la san min, foyi tè sòrò ka mógo kisi kóngò ma.

o bée n'a ta, suransantumuntòkaw

y'a mèn ko fèerè dòw bë se ka kè, minw b'a to, dugukolo fanga tè dògoya, hali ni i y'a sènè san o san. tubabunògò ni bagannògò ni dugukolo sènè cogo ni sènèfèn yèlèmali san o san foro la, o bée bë kè dùgukolo diya makaranni de kòsòn. u ye dò faamuya a la, nka, ni kalan in sera ka kunna foni di denmisènwa, u ka o bée faamuya konyuman, u fana ka se ka o bée lajèlen jira dugu mógo la fo k'u hakili latigè, o na fisaya, bawo dugukolo ko bë ka gèlèya cogo min, kalan ip man kan ka jate manamana ko ye.

## dugukolo ko tè manamana ko ye

kalan daminènen sa, kalandenw ni karamògòw ma nyinè mógo kòròbaw ka kumaw kò. u y'i ji ja, kalan ka bén mógo kòròbaw hamina kow ma.

o kòsòn, u ye kalan daminè ni dugukolo ko ye. dugukolo bée tè kelen ye. suransantumuntò yèrè lèmèni na, yòrò dòw bë yen, minw tè se ka sènè, n'o ye fugaw ni kuruw ye. yòrò minw bë se ka sènè, olu ye

kakadugukolo ye, ani cèn.cèn dugukolo, ani bògò fasan, ni suransantumuntòkaw bë o wele ko nangate. bògòjè fana bë sòrò yòrò dòw la.

o dugukolo bée ni a minè cogo don : nògò ka kan ka kè dugukolo dòw la ka caya, a man kan ka caya dugukolo dòw la. dugukolo bée sènè cogo fana tè kelen ye.

o la, kalandenw ye tile naani kè

ka dugukolo suguya kelen kelen lajè, ka dugukolo kònò fèn bée kòlòsi. nimafèn ni kògòmafèn minw bë dugukolo la, ani o fènw bë se ka dugukolo fanga bonya cogoya minna, ani ji bë dugukolo nyigin cogo minna, u ye kunna foni sòrò o bée lajèlen na. bawo, o bée ka kan ka dòn, ni i b'a fè ka dugukolo kelen kelen cikè cogo faamuya : nògò min ka kan ka kè a la, sènèfèn-yèlèmali min bë dò fara dugukolo diya kan, cikèminèn ka kan ka se yòrò minna, ani dugukolo baara ka kan ka kè waati minna, o bée bë bò dugukolo suguya kelen kelen cogoya de la.

o bée lajèlen kalannen kò, a fòr ka jèya ko kalan man kan ka dan kuma gansan lamènni ma. fèn o fèn fòra kalan in sen fè, o bée ka kan ka sègèsègè, k'a dòn, n'a bë se ka nafa sèbè don cikè la.



kalandenw ye tile naani kè, ka dugukolo suguya kelen kelen lajè, ka dugukolo kònò fèn bée kòlòsi.

# ta suransantumuntò

o kama, suransantumuntò denmi-sènw na foro dò sènè samiyè tuma. u bè o foro tila kònontòn ye, ka sènèkè cogo caman sègèsègè a la : fan dòw bè sènè dabakurunin na, shiyènni jalan bè kè fan dòw la, bùlukuli bè kè fan dòw la, nògò tè kè fan dòw la, tubabunògò dama bè kè fan dòw la, tubabunògò ni bagannògò bèe lajèlen bè kè fan dòw la.

o na kè kòròbòli de ye : fèn o fèn bè kè o foro fan kelen kelen na, o bée bè sèbèn, ka sanji na cogo fana sèbèn, ka sènèfèn falen cogo n'u mò cogo sèbèn, ka sènèfèn sòròlenw jate sèbèn. samiyè mana ban, dugukolo bè lajè, k'a dòn, n'a fanga dògòyalen don, walima n'a fanga ma dògoya.

o bée lajèlen mana sèbèn suransantumuntò kalandenwkun, jateminè na se ka kè, k'a dòn, sènè cogo min bè nafa don cikè la ka tèmèn tòw kan.



kalan man kan ka dan kuma gansan lamènni ma. o kuma fòra banankòrò fana, ni dògòkun kalan dò kèra yen, kènèya matarafa cogo dòw kan.

## sumansi ni tigasi

o kalan in sen fè, dò fòra sumansi ni tigasi falen cogow la. i kòmi suransantumuntòka dòw ma da a la ko nafa bè sumansi furakèli la, kòròbòli na kè samiyè tuma, ka foro dòw dan

ni si furakèlenw ye, ka dòw dan ni si furakèbaliw ye. kalandenw na o bée jateminè, k'a dòn, min ka fisa ni min ye.

## sanji sumalan

sani kalan ka kuncè, sanji suma cogo jirala kalandenw na, ka sanji sumalan sigi u ka dugu kònò. o la, ji bè na cogo min san o san suransantumuntò dugu kònò, o na se ka


dòn. bawo, sanji na cogo tè kelen ye yòrò bée la, o fana ka kan ka jateminè, n'an b'a fè sènè ka kè ni hakili ye, walasa k'a nafa bonya ka taa a fè.

## kalan kuncè kumaw

kalan kuncè don, kalandenw bée bènna a kan, k'a fò ko o dògòkun kalan in ye hakili di u ma fèn caman kan. u y'a jíra, k'a fò ko fèn dò wèrèw bè yen, ni u b'a fè ka dònniya sòrò olu fana kan, i n'a fò, baganladon, kènèya, nakò sènè cogo, sènèfènwa ka bana kèle cogo,

mobilèti ladon cogo, an'a nyògònnna caman.

ni ala sònna, o bée na se ka kè, k'a daminè yòrò dòw la, i n'a fò, suransantumuntò, ka t'a bila dugu caman na, ni balikukalanden kallannen cayara dugu minw na.



o dògòkun kalan ye hakili di kalandenw ma fèn caman kan.

# mè kalo tile fòlò

dinyè fan tan ni naani baarakèlaw ka donba kama, n'o ye mè kalo tile fòlò ye, kibaru b'a fè ka dò fò aw ye baara yèrè kòrò kan.

baara ye cikè de ye : cikè suguya bée. a bè kè hakili la, walima barika la.

baarakèla ye mògò ye, mògò min bè ci kè, walasa k'a yèrè dahirimè sòrò, ani fana ka caman fara jamana ka sòrò kan.

baara bè kè kungo kònò, walima dugu kònò: baara bè kè tuma bée ani yòrò bée. ni baara jòra, o ye

hadamadenw jòlen ye, o ye dinyè yèrè jòlen ye. ala m'an kisira o ma. hali bi, an ka baara kè an yèrè kama, ani an ka jamana kama. ba wo, baara de bè mògò ani jamana bò nògò la. amadu ganyi kantè kibarudilalaw kuntig



a fòra kibaru nimòrò 62 kònò ko ni 'daa ka kòrè kèle' liburu bòra tuma min, an b'aw ladònniya a la, walasa, minw b'a fè ka jeli baba ka maana tò kalan, olu ka se k'o liburu in sòrò.

**jeli baba  
sisòkò**



o liburu bòra. a bè se ka sòrò yòrò min, o filè :

ènpirimeri kase keyita

b. p. 21

bamakò

mali

a sòngò ye dòròmè 80 ye.

## kuma kòròma

mògò dò ye nalonma fila ta baara la. a ye kelen bila ka taa kò kabi. a ye kò kabi, ka se jègè ma. min nògò y'a dèsè, a ma se ka jègè minè.

o kòrò filè : mògò bè npogotigi maminè kabini a denmisènnaman, fo k'a kògò fa. a furu tuma mana se, i bè dèsè wari la k'a ladon..

nalonma filanan bilala ka taa so jiri tigè. a ye jiri caman tigè. a ko ko a bè a ta, a ma se a kòrò. a ye dò wèrè tigè, ka a fara jiri kòròlen kan.

a kòrò filè : ni i ye muso furu, a sòn ma diya i ye, n'i ye dò ye, min ka di i ye, i bè o furu. ni o kèra fòlò nyògòn ye, i bè dò wèrè furu. o tuma na, i bè to ten. doni bè caya i kun, i bè dèsè don o don.

nyènenba sogoba mawo sòròdasi kan

ne ye mure saba suma, k'a bila. sani ka dugu jè, a kèra mure kelen ye. o ye fèn jumèn ye ?

jankinè konare sòbugubamanan

jònñi kelen bè se ka shè kelen dun san fila kònò ? yaya kònè maribugubosi



yakuba buware foto filè nin ye, ka bò seriwala. ale de ye nsiirin ci an ma, n'a bòra kibaru nimòrò 51 kònò.